

屯留縣志

地 1621 (A)
39
:7

卷七

考 論 命 誌
銘

辨 贊 說 墓表

文 跋 啟

屯留縣志卷七

藝文

考

絳河考

邑侯 趙廷煦

歲丁亥余蒞屯之一月閱城隍有水自西南遶郭之北而東問之則絳河也按之邑乘云源出縣西南八十里盤秀山之陰八泉湧出飛瀑如珠經縣治東流三十里入潞城縣交漳村與濁漳合乃知絳固溢於八泉即入景中飛瀑所衍者也考之禹貢北過泲水至於大陸北播爲九河同爲逆河入於海河渠書亦云廝二渠以引

屯留縣志

卷七

藝文

一

河北載之高地過泲水至於大陸播爲九河入於渤海是絳水乃河所必經其爲要衝古而然矣但禹貢字爲泲孔傳及河渠書俱作泲余嘗疑之及觀夏紀索隱註云泲水字從糸出信都國與雩池漳河並流入海則知絳之爲泲降古文通義耳地志云泲水即冀州信都縣枯泲渠豈邑乘所載出疑山東南麓今已涸者是耶程氏云泲瀆自唐貝州經城北入南宮貫信都北與河合石渠謂北過泲水之文當以信都者爲是蓋河徙東南全非故道自漢以來漳且自達於海則古今形勢固有不盡合者惟括地志泲水源出潞州屯留縣西南方山



東北流冀州入海此與綱目及通考通典金史所載相符詎不足信歟且屯邑以山爲屏民生岩棲谷汲田畦無百畝之平非有以流其惡而沃其原則民且告病吾觀絳水蜿蜒曲折而東爲衆水所交滙如蒲谷水高麗水由西流入疑水雞鳴水於西南流入三峻水於西北流入馬跑泉於東北流入自源及委數千里而遙灌溉資其利芻茭出其中爭流奔赴浩浩乎鉅觀而先受其潤者固屯之地也按之圖籍考其源流不必常歷其地而青疇綠野包絡迴環時與洪波之洶湧隱現於煙雲杳靄之間者可一舉目而遇之至於水以絳名前宰屠

屯留縣志

卷七

藝文

二

君以爲水無不清地之所染余竊思之房陵水色鮮潔遂名粉水武都有紫泥貢之封璽故名紫水淄川出淄水俗傳以爲其波似漆如此之類不可殫述誠有如屠君所云者茲故不復贅又括地志云絳水一名白水今名弗泉流出絳山或以爲絳水所自出故卽以名之然考陸氏廣輿記云絳水由絳縣達聞喜界智伯謂絳水可灌安邑者卽此按之全圖絳山在聞喜東南則所云絳山似非盤秀山及通典之鹿瀆山也故附及之

三賢故里考

邑人

馮錫晉

三賢天下士非一鄉士屯留烏得而私之顧名賢遺迹

所至引重往往其里居之地數典忘祖他人因而附會之不惟述之於口而又筆之於書張公良通志平陽人廣輿記留侯墓在襄陵龜山麓其說未必無據及考之左傳杜注長子屯留二縣屬上黨郡前漢張良傳封爲留侯又地里志陳留文義顯別則留侯之爲純留不爲陳留久矣且邑水南村有留侯廟興旺村有留侯墓遺迹昭然邑志列於流寓故邑侯梁公迪詩云子房名相後鄉井是純留在漢爲湯沐依韓卽首邱英風瞻廟貌世業感松楸邑乘書流寓何人識故侯辨訛也鮑公永世謂長子人然余嘗讀史及長子志皆以爲屯留人意者漢時郡治長子遂收入長子志與要其爲屯留人無疑獨王公聰若知若不知人無道之者嗚呼張鮑二公勲猷炳著宜乎兩地之人共爭之王公生南北朝齊時儒士罕傳尙書之業聰兼通之而聲稱寂如何世俗之所重在彼不在此耶吾友霽庭祝堂博學好古同謀立石表之而三賢乃並峙不朽焉

辨

國體國法國是有無輕重辨

邑人 暴謙貞

自古無百年不易之治而有百年不易之道道者所以參天人而居其會所以適於輕重之宜也天有四時五

行人君法之則治失之則亂人有聖智中材爲政者因時而施化察失而立防威德迭興輕重隨用然後體立於定法得其可是歸於一此國運熾興之由亦百王莫易之機耳其體與法與是輕重之說何居乎自古元首矢謨股肱作誠喜起一堂體有在於上下者此天澤之定義也自昔望天地觀江河因山谷不吹毛而求疵不洗垢而察斑因道全法體有在於持大者此天下無不治之盛也有法以繼其體則大綱舉細目治若理絲者把緒於手而縷晰條分天下無不肖之議論有體而繼以法則百度貞衆動肅若善陶者躍冶於金而方之圓

屯留縣志

卷七

藝文

四

之天下得合一之旨歸繁縷可以惜大體而天威咫尺猶得與堂下之拜者留體統於一綫恭己可以成幾務而躬親庶獄猶得與不問錢穀者存體治於不遺或以暴虐之甚而約法三章遂成寬大之仁或以廢弛之極而嚴明政事乃建中興之字體以化煩囂而章服有等不妨誰嗣之歌興法以定人心而蜀治太嚴自立畫之教令體其骨幹乎法其繫絡而國是其定體乎其相因而不離乎體其準的乎法其射則而國是其中的之至當乎不有準的將安倣乎此豈意自爲政天地立而萬物成大體立而天地定法紀張而天地平是非真而

天地清明以不朽體元以贊化繼天以立極是在王人
知此輕重而已矣然則輕重果有一定乎夫熊徑烏伸
可以延歷不可爲續骨之膏結繩忘言可稱太上不可
施末世之衆平則養之疾則攻之德教除殘刑罰平理
時畸而任體時畸而任法時以國是定國體時以國法
成國是達權救弊總歸於道千變萬化不離其時考安
封母而乘權於恣致亂嫡嗣此失體卽以失法孝宣
審政理而嚴威峻法海內肅清此得法卽以得體勿勞
疲細小而經國大務當自斷裁雖改移剝趾而嚴重致
平素稱仁厚恩可賜而郎官必不可輕山可錫而弄臣

屯留縣志

卷七

藝文

五

必不可隱或納言而忘人君之體或斬僕以伸國家之
法有定體卽有定是無定體卽無定是有國法卽有國
是無國法卽無國是低低昂昂高高下下伸縮合節輕
重不爽千古政理執此可券惟人主參天人而用之可
乎

絳水辨

邑侯

屠直

城之西北有河環焉號曰絳水午日偕友泛蒲卮於絳
干饒有賦清興問曰水一素爾盍而絳友曰天生來予
默忖不然已考邑乘亦未悉其義伏枕思曰木有本水
決有源詢乃長年曰絳水源於盤秀山不禁問水直窮

到源頭越六月六日下連口呼埠頭挽舟溯流而上由
蓮岡過八仙臺歷東西兩陽迤西折而南烏塌渠直上
紅嶺曲曲下七八泉望之蒼然峙之互如有翠嶂插空
盤秀山也山下有泉入出淙淙有聲湛若冰壺予覽喟
然曰惟源潔哉已過石橋紆迴三里赤霞壁小憩具濟
勝盤盤層登曲陟頂上怪松萬壑奇鳥千嘯真閬苑仙
境坐石不覺飄飄欲仙迷煙霞暮不思歸山人引之小
蘿庵宿夜半松風颯颯萬籟駢吹少頃旭光晃晃透櫺
啟戶東方白小奴趨歸櫂舟沿流而下十里如藍過紅
嶺二十里如丹又烏渠而東陽七十里兩水合交半顏
志留縣志

卷七

藝文

六

半紫土人喚紫龍彎夕懸舟古槐根下山間明月水上
清風予亦就枕黎明放艇而東百里浪湧沙翻突然一
變有若奔馬旋至入仙蓮岡水愈急色亦緞直商山背
折而北地漸闊水漸平波光散灩雲樹流影舟下且行
且逗不二里榜人囑停篙凭檣下視依午日所泛絳水
也上連口豁然醒遽然歎曰噫絳果本源也哉地染爾
相彼作室堆練千疋色變具注投之藍藍投之朱朱投
之青黃青黃然則維茲之絳不亦類是與抱朴子曰水
無不清人無不善

文

聖廟上梁文

邑侯劉綱

立兩間參三才君親師永賴秀五行拔羣類生養教同
功道切人心理由天性於茲薄矣惡所厚乎恭維

至聖先師道德貫百王誠明超列聖經籍著中天常明
之日月綱常振萬古不竭之江河上繼羲皇堯舜淵源
下啟濂洛關閩肩鑰千百年牆杏生春億萬載幽蘭永
馥七十子言行箴規罔非矩度三千徒應酬叩激皆是
準繩仰思

先聖先賢蓋葺高堂高宇况西國名邑地接太行之脈
方輿上黨水連河洛之流巖山列屏幃於南隱隱龍潛

屯留縣志

卷七

藝文

七

之勢絳水環襟帶於北悠悠蚓曲之形鳳凰峯蓮花岡
名山夾峙於前高麗泉神女瀑巨津尾分於後瞻茲古
地間出巨人雖山川之炳靈實教化之純被比因荒旱
乃漸澆漓學校久廢致風猷之不競廟廡圯敝將瞻仰
之弗欽詔合壅而不宣父兄以爲大戚顧惟竊食敢不
究心竊效魯山之化而未能欽慕若水之功而有得愧
乏公輸之巧欲起子完之功擴大其規模盡於基址聿
新乎制作謀於神人取鍛潞河之湄不須亂也伐材介
山之巔何用楫乎虹梁卧碧海之蒼龍畫棟起丹山之
彩鳳方員偃植務丹牖以肆煥棖題藻稅必體制以不

凡輪奐岨興覩者爭先以爲快規模立就聞之興歌其
出奇萃百巧以增修極一時之壯麗僦功見效獻室有
期不惟制度同山川而益久且使文運與造化而同流
清廟巍峩列瑚璉罇壘之器高堂突兀蓄珪璋梁棟之
材文章增氣爭誇耀日輝星士類馳風芒看攀龍附鳳
爰卜吉日遂茲永圖聊出詞章於梁灑想均童耄以懽
呼拋梁東趙魯燕齊入望中地控名邦霧秀萃騰騰文
焰拂長空拋梁西三嶮屹立聳雲齊和氣鬱蒸生俊傑
黃金榜上後先題拋梁南嶷山勢與太行參層柱孤根
蟠天地中函元氣吐青嵐拋梁北萬里河山秦晉國當

屯留縣志

卷七

藝文

八

年土宇任瓜分今見輿圖歸聖國拋梁上列星耿耿皆
旋向爭挾董策進巖廊坐取功名總人望拋梁下膏腴
之田生瑞稼民間豐稔樂時雍閭巷絃歌享聖化伏願
上梁之後文運亨嘉士風丕振精神日倍揮班管倒峽
懸河科第歲增著祖鞭登雲步月錦心繡口文追韓柳
歐蘇藻鎖玉衡學屈班楊賈馬戰文陣賈以一當百之
勇窮道本極涵三爲一之功有賴聖神少禪王化

邑侯何公太孺人壽文

邑人暴煜
觀察

嘗讀詩南山有臺之篇曰樂只君子民之父母夫爲民
上者能使民戴之如父母則其平日之能視民如子可

知爲民上者既視民如子使民戴之如父母則其平日之能盡子道而事其父母又可知邑侯何公蒞吾屯兩年有奇拊循士庶政化大洽於是白叟黃童輿頌四作乃以太夫人劉遠隔天涯於客冬迎養抵署閱萬里如旦夕歷險阻如平夷四境莫不歡欣而鼓舞可謂孝思之感格天人矣戊寅八月廿九日適當設帨之辰邑之人郵札而請序於余余託公編氓之列感公德愛稔公治行其何能已於一言哉太夫人裔出青田來歸望族其相夫子也敬戒備至事舅姑則承順維謹甘旨之奉必躬必親孝養極誠爲近今罕覩未幾而矢志相舟太

屯留縣志

卷七

藝文

九

夫人泣謂公曰汝世業詩書當勵志成立以慰藉先人公以是益銳學壬申舉於鄉闈二年錄明通卷奉

命簡任來晉初署永甯州牧旋授屯邑令太夫人至署時見公輒曰汝寒士也得受

國恩勉圖報効在此日耳公每出廳視事必囑曰愛民如子毋傷厚道昔雋不疑爲京兆尹每行縣錄囚徒還其母問不疑多所平反母喜笑爲飲食言語或亡所出母怒爲不食賢哉母也太夫人有馬我屯號稱難治士瘠民貧地當孔道徭役殷繁昔之宰斯邑者深苦撫恤之艱維公下車軫念民瘼凡可寬民之力節民之財因

不悉心籌畫釐剔弊端他如遇士也以禮懲惡也以法
勘獄案也以神明馭胥役也以嚴察人第知公之卓越
於羣工者爲最著抑知源遠流長其受學於趨庭承休
於幃教者爲益久且渥乎余遠守閩漳未及宣揚盛美
然方今諸上游皆海內名賢廉公之深譽公不置口自
茲而游歷封疆晉秉樞軸大展其經濟設施使天下之
蒼赤無異吾屯邑此日之愛戴公者而太夫人康強福
壽當必有時獲家存問如昔太宗之於張齊賢母晉國
夫人故事南山之什曰民之父母又曰遐不眉壽余旣
引詩所謂民之父母者頌公而卽以眉壽黃耆者囑邑
屯留縣志

卷七

藝文

十

之父老子弟從容致辭侑太夫人一醕總取其義於南
山之詩云爾

論

鮑永傳論

前宋 范蔚宗

鮑永守義於故主斯可以事新主矣恥以其衆受寵斯
可以受大寵矣若乃言之者雖誠而聞之未譬其苟進
之悅易以情納持正之忤難以理求乎誠能釋利以循
道居方以從義君子之概也

贈光祿寺寺丞路聽論

明大學士 申時行

昔魯仲連云所貴天下士者爲人排患釋難解紛亂而

無取也豈屯留路公謂耶天下無事謀智勇辨之士無所施其材粹然有急連城跨邑之吏坐巽輒而不事事擯棄僂辱者何可勝數也乃如路公身不挂銅墨位不當民社起委巷布衣中設策奮力存孤城殲劇寇成功不居可不謂奇士馬及其厚施薄望不輕爲然諾身所賞賚惟恐見之古稱俠士之義方茲茂矣假令公借尺土立輿潔而升本朝其建樹可勝道哉然公身不試用而其效託之乎後人夫天道猶酌也挹彼注此豈不信乎

交友論

邑人 霍 達

屯留縣志

卷七

藝文

七

黃勉齋言朋友列人倫又所以綱紀人倫我中憲與弟子萬雖名高天黨不過三晉人士何敢曠而擬之四海九州乃以澂源遇楊左以楊左善魏大中周順昌李應昇周宗建董其昌諸公不但已也又與鄒忠介趙忠毅往來贈答函函談心爲綱常名教所賴其地步示人遠矣何後人靡靡親嗜利忘義之輩昵游手好閑之流妄冀人品卓越德業成也噫

贊

題尹孺人節孝贊

邑侯 周人龍

人不幸爲婦又不幸爲節婦不幸爲節婦幸有節婦有

世道人心蓋世道常存人心不死惟節耳已男子不節
王珪魏徵皆再嫁婦女子不節卓文君黨家姬皆穿錦
食稻敗常亂俗之獸禽卓哉霍母防身守貞豈惟閨門
懿道抑媿朝堂二心

跋

鄉試後跋

邑人 暴謙貞

歲辛酉爲天子新膺圖籙之元載臣待罪省垣循咨承
乏副史官臣謙益往與浙試臣樸散無能往陳秘館耗
大官俱具與上方筆札者三年今居掖梧鹿鹿靡所獻
替茲事之役幾幸畢弋碩大光明圭璋樸棫之彥進於

屯留縣志

卷七

藝文

三

皇上庶幾少解官謗自附於以人事君之義啣命以往
若涉淵冰齋戒洮頰肅拜將事事旣單爲錄以獻臣宜
有言未簡竊謂士以鉛槧之業與臣忽成鍼石之引其
神契允足知心勉醮箴告不敢繁稱勦說以謏衆聞臣
觀多士初舉於鄉行省諸臣導揚天子休命燕而饗之
使工歌鹿鳴者三夫鹿鳴明王所以燕羣臣嘉賓也多
士甫就鄉舉累然一書生耳天子遂從而賓之其爲饗
綦隆矣食之以禮樂之以樂賓主間有不盡愛至真意
篤摯必先示好於周行君子攝儀大人格正是則是傲
洵不越此臣今有以諗多士矣易有之履道坦坦書有

之王道蕩蕩皆周行也士束髮受書以至膺仕師世範躬奮庸宅揆節義文章道德坊表天下萬世皆是物也一不違於周行則爲徑爲竇遇則爲於巷困則爲於石投足僂迹終身偃偃其何之今日者有笙簧之樂有承筐之將而又有周行之示士自此用賓於王利有攸往曠然若發蒙矣浙河東西古稱人材澤藪其在昭代名卿碩彥錯落日星悉數之幾不能終若方正學于忠肅王文成孫忠烈諸君子猶龍之宗有鱗而鳳之集有翼也靖難一事正學植君臣大義於人情反覆之時逆藩之變忠烈折其鋒文成戡其亂殉事成事千古烜赫至

屯留縣志

卷七

藝文

三

忠肅以孤身隻手倡社稷有君之義遏邪論於南轅返六飛於北狩所謂狂瀾砥柱者也多士生長諸君子之鄉爲聖朝譽髦之士而業不追躡其盛德不克紹其光是不亦昭持衡者之過而貽鄉國之恥乎如恥之莫若於所謂周行者而求之諸君子之於周行也非苟知之實允蹈之篤孝端謹聖賢自別正學之周行也狷介忠誠分謗任怨一以利國爲嗜欲忠肅之周行也方畧便宜慷慨誓師百讒交構計不反顧文成之周行也有三句九食安貧樂道之正學而後有百折不回之正學有食不重味居不闢廬清風兩袖之忠肅而後有赤手同

天之忠肅有投荒瀕危澄心精慮之文成而後有咄嗟
定傾之文成向令變難卒臨於所謂周行者稍參以委
蛇之見而雜以遷就之心利害震怵於外毀譽錯歧於
中其神不全其志不壯其氣不揚又何以排議奮臂勒
鼎圖麟而昭揭日月於天地間乎多士其厚自矜奮釋
思周行之義而無自退遜乎於爾鄉先正詩不云乎高
山仰止德音孔膠行彼周道其則不遠是在多士之求
之耳今疆場不靖震我上京內覺潛滋談虎嚙指聖天
子宵旰憂勞思得忠肅文成於此邦也故臣等此來實
有奢望顧不以建功策勲還相勸勉而汲汲於所謂周

屯留縣志

卷七

藝文

古

行者蓋功名事業就與不就皆天也士所可自必與自
信者此物此志耳考地志會稽實揚州鎮山而東南之
美者會稽竹箭獨載於爾雅記有之如竹箭之有筠也
如松柏之有心也貫四時而不改柯易葉多士於文郁
郁乎彬彬乎信可謂東南之美矣臣所論於士其不改
柯易葉者也括而羽之鏃而礪之進而爲忠肅文成以
盡竹箭之美惟多士之能不然則亦守其樸學師其素
心無改柯易葉舍竹箭以效栝樅之用此多士所可自
必與自信而臣所可期望於多士者也臣所謂詔士以
周行者盡此矣庸敢次第其語申明鹿鳴燕饗之義以

終嘉賓式燕之德音而進之天子告厥成事臣又讀詩
小雅至六月之序謂自鹿鳴至菁莪先王所以治天下
者盡在於是小雅既廢則多方侵叛而國家式微故鄉
飲酒禮及燕禮皆歌鹿鳴四牧皇華然後笙入堂下間
奏南陔白華華黍士答君王以天保皇上初服籲俊多
士以南陔白華孝友潔白之德起而歌鹿鳴小雅之什
其如天大貺乎王國匡則彤弓錫四方不敢侵叛而國
家靈長小醜豈虞跳梁臣今日爲多士歌鹿鳴也它日
爲皇上歌六月也臣請執是錄以須之矣

命

屯留縣志

卷七

藝文

五

誥封宜芳鄉君段朱氏訓子遺命

余以宗人作配爾父時年幼沖敬修饋祀所賴儀型嚴
明以致終身寡過於今四十有四年矣兩女皆嫁一子
納妻復何憾焉自念我雖受朝廷爵祿猶知稼穡艱難
克勤克儉冀借子婦以成家而守先業於不墜不意命
蹇嬰疾有志未伸立身成家端惟吾子是望乃子賦性
剛暴侮慢自賢質凡近而不好學安能洗積習以游高
明識卑陋而不好問安能盡精微而致廣大是則辜我
之望而遺我之憂者也竊思子自幼至長我無時刻忘
心爾父高明剛克我每兢兢落膽爲誰懼哉懼吾子也

撻汝詈汝痾瘵我心涕行無數氣塞胸膛爲誰痛哉痛
吾子也區區此情誰其知之知之者神明誰其聞之聞
之者天地而吾子反若不知不聞吾何望哉且子行義
不勇以血氣爲剛大言不慚以攻發爲直此吾之所深
憂而未嘗頃刻忘懷者也自今以往當以懈惰荒逸爲
懼勤勵不息自強待旦之坐法周公當晝之眠戒宰予
爾父雖嚴鬚髮頽白精神內耗爾宜視無形聽無聲承
顏養志使其胸次悠然乃可爲孝不然則無以爲人無
以爲子矣子家雖貧守廉恥以自潔子婦雖拙且姑待
以成人酒宜深絕量貴有容有疑思問小忿當懲親睦
九族職分當然謙卑自牧人道先務功名有分天爵當
修身命匪輕尤當謹疾深耕百畝不可妄求誦詩讀書
以俟天命我今其逝不能再言兒遵此訓藏之篋笥用
以示於後人

說

耕讀說

邑人

霍芝

耕安一家形質讀廓一己性天蓋田野無物不有肆吾
力以相取多取不爲虐詩書亦無物不有非吾分所當
取寡取卽爲貪故仕進報主顯親立念不是圖己工商
爲機設變擇術還以欺人惟野無曠國無游勤儉爲克

屯留縣志

卷七

藝文

六

家令子正其誼明其道伏處卜治國良臣所以爲民貧
農夫之恥爲士不富非儒者所羞願與天下後世研斯
理

啟

啟路天德

楊博

公落落不羣天下士罕入心目於貴鄉霍龍洲恒稱道
勿衰不面而知其爲佳士也不遺管城遺帶一枝翎毛

啟瑞環霍年兄

王錫爵

吾輩寒牕居鄉不可不進士居官不可不名宦子汲汲
名宦何不徐徐進士所期當遠大勿疑蹉跎子

屯留縣志

卷七

藝文

七

又

前意非不願子仕願子進士耳忽忽數年進士可期未
可期功名可就不可不就本夙夜匪懈之志以爲官勿
謂舉人不可駕進士而上

上李參憲

邑人 知府 霍應麟

糶倉本美件然今民患在艱食尤在兵餉兵餉寬一分
力卽解一分艱食之苦官惠在散粟尤在征賦征賦緩
一日限卽多一日散粟之仁上以爲澤下民不以爲利
已可爲不可爲故弊劫之餘多事不若少事有事不若
無事推陳致新雖理不易然作價仲夏納穀季秋擾擾

非計不然嗚百姓從己欲卑府不爲也回天便民仰大人調停耳

啟名閣公

楊漣

聞貴鄉路天德李子愚高品心甚仰之董程二公稱足下落落態殊不讓前賢前過慶陽路公休致其樹之風聲猶揚誦行人之口余稽都中閣人孔多某曰某官某曰某地總不在方孔外打算追公後塵伊是何人

啟襟漳年兄

左光斗

公贊子萬才學非不可赴功名乃廣文湮沒非湮沒正遠其聞望耳不然吾輩日在朝堂與衆人是是非非所爲何事對之不勝赧顏

屯留縣志

卷七

藝文

六

啟子萬

董其昌

昔季常有康成僉云風流先生道學門生今子萬有襟漳可謂道學先生風流門生

請邑侯來公啟

邑人 李鍾庚

來穀來刑楓階久虛來宰相來雲來雨山城早後來我后天地來草木知恩父母來子民戴德恭惟來老父母台臺西來夫子東來聖人識透來還之機學參如來之妙古來卓魯今來龔黃期不來丹鳳啣來仙詔何所來竹馬迎來花車陽春來闔境草蘇薰風來四野民阜某

等幸慰暮來之望曷已子來之忱謹誦來日三辰仰扳
橫來之駕聊賦臆來數語少賡公來之歌公來燕來甯
福祿來成公來燕來宜福祿來爲公來燕來處福祿來
下

文武生員詩邑侯送學啟

邑人孫奇

帝業邁皇廊廟重珪璋之選國靈丕振邊陲賴扞衛之
材治安計乎百年文武儲在一日卜劍匪易薦桃實難
恭惟恩師台臺德隆千古剛塞兩間易禮詩書接孔孟
之真鉢風雲龍虎譜孫吳之秘韜機械肆歌多士仰章
天之化俾舟載詠六師奮于邁之從陳俎列豆璵璠

屯留縣志

卷七

藝文

九

珊輝業虞稱戈比戟犀函肅肅護山河詎一時之國珍
實干祀之磐石作人無數訓旅有方某等之無未識步
伐多愆賴夫子之勗棘門不等兒戲履聖人之域羊歧
不迷正宗氣分關里罔裁堪經天而緯地誕荷天民有
覺並母鞠而父生雨露生恩霜雪戴德謹占某日之吉
旭霽陽生聊將一勺之忱衷披肝瀝望文茵之轂轉執
爰前驅迓塵尾之風臨掃徑下榻莅類講學說長屈醜
碧藻三賡傳玉鑰釋奠告功獻琛貢象朱干兩舞綴金
甌翹首龍光伏塵熊載

誌銘

周郡功曹崔公墓誌銘

崔君諱玉字枌林上黨屯留顯陽鄉孝義里人也其先炎帝胄允封望於齊地方五百秦皇受錄用始祖崔伯基爲太傅封清河晉后膺期因官住此太祖崔暉并雍二州刺史食邑屯留曾祖崔惠征南大將軍西河太守金紫光祿大夫祖崔虎德簡四科勳効有功除爲東宮洗馬明威將軍博陵太守父崔珽志業肅成文武可取探虎口而揮戈上魚膺而懸胄故以名入司勳功高爵賞除爲高唐令林身藉祖父之宏基懷尼父之溫德名

屯留縣志

卷七

藝文

三

流州郡聲高製錦周建德六年舉爲郡功曹何圖禍鍾春秋六十有二而卒以大隋大業十一年歲次乙亥正月甲午朔廿七日庚申葬在顯陽鄉平原之地南瞻零泉之水北望黃沙之山東帶濁漳西依積石刊石立銘其詞曰林性好閑雅博聞大度志意雄猛神資獨步衮含廣博名稱遠舉三歸十善行檀遍布泡境无常電光不住不繼煩惚之因同入涅槃之路忽離旒隨遊神淨土自在无爲祇洹之圃

隋西門郎將李公墓誌銘

君諱寶高元里人也乃是顯頊之遠胄楚王之苗裔李

伯陽之後允大國征西公南部常書洛陽公史侍葛柱
國大將軍李思仲之元孫七世祖顯魏明帝詔授上黨
屯黃二郡守屯留公食邑二萬戶遂居上黨子孫世家
焉高祖問魏武帝詔授驃騎大將軍曾祖征拜爲安定
郡守祖方興安西將軍穎州刺史父元建德六年周武
皇帝詔授西河郡守汾州刺史寶人才雄畧志性高明
大象元年周大王召爲屯留邑主簿至二年補爲縣正
開皇二年刺史文盛公補爲千人營主至三年補爲西
門郎將寶清風懷遠能仁能孝能俊能恭奈金烏運轉
玉兔時移一豎催人奄流傾謝以大業十一年十一月

屯留縣志

卷七

藝文

三

卒於私第十二年歲次丙子正月葬在屯留城東四里

李高村西北

尚有脫畧石
斷不可讀

唐朝散大夫苗君墓誌銘

君諱裕字君綽潁川長社人也十一代祖漢景二年封
潞縣侯食邑屯留子孫因家焉曾祖貴魏封安樂郡開
國侯祖壬齊諫議大夫公以隋開皇二年州貢進士行
修廉潔射策甲科起家授朝散游騎尉爰屆貞觀之嗣
遷授上黨郡主簿職總羣司能官涖政公夙彰令譽洞
曉幽微屬唐起運先赴義旗勇決驍雄摧破兇黨特授
朝散崇德賞功識道味之淺深知榮辱之倚伏雖佩榮

職非其願也於時邱圍守素體道居貞上元不鑿春秋八十有六嗣聖元年二月戊申朔十二日己未奄從風燭哀哉命也哲士云亡夫人郭氏乃隋驃騎將軍刺史璋之孫也貞專淑順聖善母儀肅穆閨闈防閑內則風枝不靜早已殂落以天和元年實沈之歲羽形物化卽以其年十月甲辰朔二十九日壬申合葬於屯留故邑城北一里之原恐田成碧海渚變松巒勒銘記於元扃詞曰穆穆軒黃綿綿后稷貴賤彰顯嘉禾播殖休烈鴻猷信芳垂則允嗣英哲皇王羽翼泉扃永閔何齡瞬息

唐上柱國鄧君墓誌銘

屯留縣志

卷七

藝文

三

君諱恢字文廓南陽人也因官從駕遂宅屯留其先蓋基黃帝漢相待中鄧艾之苗裔鎮北將軍鄧辰之貴允若夫瓊根始構瑤緒發於帝軒玉樹分柯寶族興於鄧國洎茲以降厥後大昌闕闕蟬聯不可同日而語矣曾祖顯齊耀鋒將軍使持節四川諸軍事恆州刺史祖遵明威將軍兼長流幽州都督父霞隋朝請俄遷清胡府校尉並得謀猷王畧參預霸機有燿緹緗昭彰雲閣佳君承家赤水蘊質紫山竹野逢猿早知劍術唐運之始九五龍飛君預八百之期遂遙孟津之會舉旗斬將屢捷魚麗告廟崇功起家上柱國方當輪誠絳闕畫節紫

庭不謂忠効莫申風霜奏理大唐咸亨元年十月六日
殞於私第嗚呼哀哉楚寶不復登壇漢珠無出照乘士
女流涕如思鄭產之亡察采興嗟似哭羊公之歿宅兆
無曠窀穸有期卽以咸亨二年十二月甲子朔十日癸
酉遷窆於余吾城東北二里東瞻大澤龍蛇所生西瞰
嶮山風雲交會南臨絳水縣帶屯留北眺傾城聖泉靈
異於其四勝乃置廟焉恐陵谷遷移勒斯銘記其詞曰
壽邱孕聖鄧國開基金柯潔耀玉葉凝暉千齡軒冕萬
古垂衣君之嗣也維嶽降生松貞竹秀玉潤珠明雄圖
鬱起謀畧縱橫闕川不駐日迫崦嵫玉辭荆岫珠沉漢

屯留縣志

卷七

藝文

三

涓勒銘悽愴斯人在斯

乾隆四年縣西北二十里鄧村土地廟後因築場得此墓石始知鄧村之所由名也

○按鄧君以從龍功階至上柱國亦一時顯者而誌不書所歷官階所載古地如聖泉靈異於其勝置廟者今亦不知所在

唐公士驍騎尉尉崔君墓誌銘

公諱通字處徹屯留人也望隆宗祏緒祿武城

缺一字譽

猷畧而言矣祖進閑居體命父璋晦迹遺生

缺一字秀發

三芝光含兩璧惟君驪泉瑩質鳳

缺一字生姿懷橘之年

早抱雄畧屬以雲亭扈畢社首告成授君驍騎尉旌時

運也既而塗窮在已

缺一字山之日不歸運迫居肯還海

之波遂往春秋五十而卒夫人申屠氏之長女儀貞月

亮色豔桃春操履並清言谷雙麗何意鏡中鸞盡匣裡
缺一飛春秋卅六而逝矣可謂偕老有歸同穴斯畢嗣

子醅藝等想陟岵而崩心念循陔而稀魄今以永淳元
年壬午之歲建亥之月廿六日乙酉合葬於村東北二

里之平原禮也宅茲勝地厝此元堂悲纏薤露響切叢
楊其銘曰武城啟族支派屯留芳規有譽壯志無儔惟

君缺一武畧英邁標功篆素式建芳猷其一夫人之缺一
字缺一月亮儀貞言容雙麗操履兼清運中龍盡缺一為傾

九泉扇兮永夜千載訣兮斯亭其二○石於同治年出
村案乾封元年正月高宗東封泰山崔以軍校從行誌云雲亭冠畢社首告成是也其二云公士蓋宿衛之

屯留縣志

卷七

藝文

函

士當時有其稱也

唐處士常君墓誌銘

君諱舉字孟德屯留人也遠祖撾公之後祖江齊任相
州司戶參軍父貴任輕車都尉昔黃龍啓圖命族因於
玖鳳元珪錫瑞祚土基於萬因威秦跨趙擅美於常山
藉魏陵吳珪璋於井絡惟祖惟父衣冠不墮乃文乃武
實謂兼資弁菜重柯縉紳無代惟公桂莛騰芬機神俊
逸該綜強仕忠信表於州閭孝敬之道光於黨塾至於
秋○臨池春花迹樹琴觴自翫僚友相趨故得姓於邱
園乃忘言於纓冕歎川不息閱水難追今以垂玖拾墨

家穉德州縣令以萬歲通亦元季薨於私第惟夫人張
楊貳族並以季登耳順早已朦霞質操姬姜先從窀穸
遂合葬於屯留驛北壹里之平原禮也石於同治年出
縣西十里魏村
文正書時雜行草今俗書壹貳叁諸字見於古刻者
釋山碑有壹字樊安碑有感字神識碑有叁字華嶽
碑有拾字餘不多見泰乃漆之古文俗書爲柒拾卽
拾字此誌九鳳作玖鳳九十三作玖拾叁二族作貳
族一里作壹里凡數目字無不改書亦好奇矣其餘
國作因月作⊗授作稅天作𠄎年作垂則武后新製
字常君以年九十三授縣令而標題仍書
處士古人之樸也所云遠祖擢公無可考

唐姬君墓誌銘

君諱素軒帝之苗襲姬王之胤胄曾祖留隋任廣州錄
事祖肅隋任徐州司法考瑋唐穉朝散大夫並思逸麟

屯留縣志

卷七

藝文

三五

經精超豹畧操刀就列利器從班暢東里之威恩奮西
門之風彩公毓德中和資霽上善霜華凜性氣掩秋輝
露彩凝精神光春艷詞林惹蒨綺繡楊鳳於文條筆海深
沈渙董蛟於辯窟然志輕軒冕性重林泉風區相趨琴
樽自得豈謂服祓斯漸監豐逾復以髮歷二率二區十
六○卒於私第春秋八十有一其率三區十七日葬於
村西北一里平原禮也嗣子德靜痛貫風枝悲漚露序
恐疑峯亘躡碧海塵飛庶勒遺芳乃爲銘○鸞岫西峙
龜川東鏡仁敷動植道融翔詠石於道光中出姬村西
北里許石佛溝誌不書
姓據村名知爲姬也誌中月作匪聖作聖日作○並
武后新製字穉季等字同其別體書如器作霽痛作

腐魚作重皆奇餘如虎夔
奮充龜豐等字亦非今體

唐王君墓誌銘

君諱德并州太原人也因官述職遂為上黨郡缺一原

夫駕鶴仙宗朝鼻靈裔臨危聳轡忠孝可標見難投軀

恭友所感鳴鐘鼎食燧平圖史曾祖諱茂材構廊廟器

溫珠玉隨朝通議大夫行并州晉陽縣令祖諱觀黃金

一諾白珪三覆唐朝正議大夫行沁州司馬父諱買風

神霜骨就書翫道先朝文林郎吏部常選唐朝任潞州

寺丞惟君不藏無益之器不用非常之寶茂軒冕重琴

書春秋五十卒於私第夫人張氏白水閭源清河引派

屯留縣志

卷七

藝文

三六

藍田麗玉欒浦華珠豈謂月落仙娥星流神婺以開元

三年歲次乙卯十月己酉朔廿四日壬申葬於屯留縣

西南十五里平原祀也其地即韓王按劍先都夏王乘

櫟舊邑東瞻驛路使皎珠星西望禪河波澄金月平原

南望極日三春絳水北臨朝宗万里嗣子胡子等孝性

純深攀號悲慕既通松檟奉遷靈柩懼陵谷之賀遷銘

徽猷於琬琰乃為銘曰緱山駕鶴鄴縣乘鳧臨危吐御

見難投軀乃文乃缺七代謝日月居諸石於嘉慶年出

長溝嶺誌中古地禪河今無考所云東瞻驛路

即屯留驛在縣西魏村南見前常君墓誌中

唐張君墓誌銘

君諱慶字恭南陽人也曾祖義隋任本州功曹祖榮朝
散大夫父熾號騎尉君宿挺凝輝早班合緒淑州縣之
莫毘俯鄉閭賞性缺一桑榆之秋遽對芙蓉之使夫人
崔氏武城人也婦德有彰母儀克著豈謂川有急流風
無靜樹息思齊授小軍隊副幼學詩禮長歲從戎不顧
微軀唯祈報國何期福考禍倚寢疾河源以開元八年
歲次癸申十一月庚戌朔廿一日庚午合葬屯留縣東
南一十里平原祀也其地鮑永名墟屯留勝邑後臨絳
水左控漳濱恐海變山移鐫銘不朽其詞曰其一猗歟
府君柏茂蘭芬幽戶永閤厚夜長昏其二恩逾孟母德
屯留縣志 卷七 藝文 三

重曾親高堂有日長夜無春其三膝下深恩敬缺一仁
凍雞上陣駭馬飯魂

唐郭君墓誌銘

高祖諱春曾祖文寬祖隣伯父叔父府君諱榮字德明
即代上黨潞州人也府君享年七十有一立姓偏忠政
闇蘊藝以超時遠規章於閭里二舉俄道終於乾祐五
年八月三日夫人務女質肅母儀四德早章三從府備
享年七十忽奄乾祐夫人詎三男長榮男素押司官男
會真崔氏長男宗使院長口宋氏男思常氏男章李氏
郵男郭万節度使牙將云云石出縣東南五里藕澤村
連姓修屋得此字形磨滅

缺畧尚多姑錄之以存古迹

唐河東上黨郡大都督府屯留彭君墓誌銘

君諱珣字洪珣其先宗彭祖洛川彭城彭仙公之後曾祖敬齊伏波將軍上黨太守因官子孫於此家焉父亮上柱國志重琴書博通詩禮寬而得眾敏而有功接士則握髮吐食通賓則恭而倒屣立義則友親三益存信則用治二難敦張范之淡交喜披雲之邢呂不謂災纏二豎乏方朔之神經夢奠為楹少秦醫之良驗俄然魂為蕤袞魄散岱宗滄炎還空形神奔滅嗚呼哽塞涕恨奚言春秋本開元七年二月殞於私第夫人如氏柔儀

屯留縣志

卷七

藝文

三

泝質媿南國之無雙貞順閨連比西施之少返訓母儀之合則撫孤幼之慈仁四德不虧六行兼備其君居家至孝奔公名而不仕鑿井而飲耕田而食晝夜匍匐易色而養二親竭力勤勞夙興而恭君父孔懷數十怡怡之敬鴈行猶子五三推梨之讓尤重其被傳衫之美千古流芳弟瘦兄肥之恩百齡不朽俄然病纏積朔痛疾弥留風燭不停奄從化德春秋冊有八開元十一年五月殞於私第嗣子禮順仁深至孝思慈父之悲酸泣

續

開元廿一年十一月甲子朔廿一日甲申葬屯留縣西北十里高原禮也前臨絳水逝矣驚波後背余吾煙霞

悽愴左盼右顧勝境尊焉其詞曰遠祖老彭不滅不生
返年壽考日月齊明何代無賢何君無曜石火須臾輪
迴無定人皆去留有衰有盛其一三年之重七日銜悲
慎終追遠以時思之父母之年不可不知生在唐年歿
在唐時幽泉永固千秋不移其二石於同治年出縣
父四年歿葬同塋故文中誌其父亮至詳祖敬齊上
黨太守與前主君誌父買潞州寺丞並有碑於邵乘
唐封六品子李公墓誌銘

公諱安定字文德隴西狄道人也十二代祖封上黨純
昭侯遂家焉雲中太守之族孫陽城太尉之滋緒恢復
疆宇功高衛霍之先開國論封位列諸侯之上高祖和

屯留縣志

卷七

藝文

五

并州司馬曾祖道祖遇陪貳副尉文公坐仁義以爲郭
據忠信而爲郭依依春柳濯濯寒松謹慎白珪嘉溫虹
玉棲遲衡泌無忘孝敬之恭晚落簪裾不失忠貞之節
仁道未已俄延白驥之徵龔露斯瞻遠切青龍之兆時
開元九年五月遘疾終於里第夫人宋氏七篇馳譽五
綺飛聲慈愛內融風儀外發年七十五開元十二年正
月亡於私寢以開元十四年丙寅正月庚辰朔十八日
丁酉合葬於古屯留城東南二里平原祀也嗣子行良
等對寒泉而匍匐履荒隧而充窮夕臨墳塋碎山川之
木石晨悲枯樹感烏兔之馴游松柏爲薪變千秋之岸

谷蓬萊水淺成萬古之桑田邈矣吉人慄然岐嶷佩仁
踐義懷才抱德爲物不貳舉動有則滅歿荒阡寂寞郊
垵

唐處士杜君墓誌銘

若夫五緯離天應編珠而演賦三江紀地鬱理氣而資
靈故得蘊用誕生載圖丹誥君諱羨字郎仁先世扶風
京兆系也瓊根布彩已流芳於帝幸玉葉凝輝乃振霸
於周室遠祖岐魏任上黨郡守屯留縣開國侯列土封
疆子孫曰而宅此曾祖龍齊任忠武將軍或東嶽衝冠
立宏功於橫草或掃除妖孽奮壯志於遐荒祖國隨任

屯留縣志

卷七

藝文

三

揚州江都縣令偉蓋俗而勇和則移風起詠引清流而
瀉液則變鹵登歌父暉皇朝投議同三司昭義烈也其
時詔曰門下杜暉等並保固城邑捍禦兇徒功效克隆
宜從褒擢咸依前投惟君道洽時倫行高先悲生而靈
異奇節早聞特達珪璋神机英偉遐邇稱其善政閭閻
讚其仁明孰謂靈砭罕徵仙丹匪驗春秋七十有二卒
於里第夫人厚狄司徒二族並蹈和成性體履居貞仰
道樹以徘徊則禪枝聳念俯貝葉而鑽極則寶偶登心
躬儉閨闈不捨如賓之敬豈謂積善無驗俄撻一豎之
灾福不輔仁忽致兩楹之酷龍朔季中歿于寢室嗚呼

粵以儀鳳四季已卯之歲二月壬子朔十○辛酉合葬於余吾城西北六里之原祀也東瞻故邑西瞰三窵陂澤滂霈帶其前漳水波瀾暎其後將恐鯁瀛靡固終有化於桑田鳥支斯紀庶不紊於荒埏其詞○周邦啓業漢將沉沙大君有命開圉承家猗歟載譚克初光華宵人不或干城爪牙 其一 道茂經邦材隆構榘巨壑舟遷太蒙光謝佳城鬱芳既啓先遠俄其不借啼鳥嘶而無春隴草宿而何化庶清風之永穆紀元猷於大夜 其二

縣西北二十五里東枝村民取土得此石誌中字體照錄

明奉政大夫四川按察司僉事七泉李公墓誌銘

重刊縣志

卷七

藝文

三

翰林院侍讀劉虞夔學士高平

不佞始生聞薦紳大夫稱說嘉隆間名御史必曰留吁李先生云會先生起家僉臬廷見上奏進止禹昂班行中爭跋而觀之曰是夫之爲人巖巖者嘗在南床草疏劾兩權相柑豫詞而陰中之出補外乃今倔強猶昔藉令端拱立階前豈異堯階屈軼哉亡何先生拜官之蜀輒翛然投簪紱歸隱蓋予嘗以言壽先生謂先生宜應明時出安得竟老玉人駒谷聞而先生以萬曆壬辰二月卒矣嗟乎傷哉公卒時余方執先淑人喪不得走哭先生而先生仲嗣太學君儼然顧余於倚廬請銘先生

墓曰先生治命也余雅知先生安敢辭按御史中丞八
泉李公所著狀先生諱之茂字汝培別號七泉潞之留
町人先世有逸民子實者當明初時衣褐衣謁高皇帝
於金陵陳便宜事上曰是民也而出吾國乃命司徒爲
立忠民戶子實生純純生孝孝生讓以明經薦入賢關
讓生仁仁生朝卿累贈奉政大夫陝西按察司僉事娶
於郭宜人卽先生父母也先生生而穎異弱不好弄
甫一齡贈公歿家故屢空郭宜人韶年持柏舟之節右
序而左抱先生嘔晷之日中突無煙也比垂髫卽卓
犖邁倫初受孝經小學於伯舟山翁所一過不再讀已

受尙書爲文盪滯源泉援筆數千言立就乃其攻苦下
靡不膏映雪囊螢也者嘉靖壬辰補縫衣茂才與中丞
公俱中丞公業禮先生交歡中丞公日相與上下其議
論乃更業禮兩人才名嶽峙人稱晉南二李以比平輿
二龍焉庚子舉於鄉癸卯游成均因從歐陽太史講業
長安中太史說詩先生又更業詩蓋先生湛涵六籍包
羅百氏以三經著聞當是時先生方用行誼表晉儒流
中而文聲流播宇內一時學士大夫靡不以名世期先
生而先生八上公車不屑卑卑爲經生家語竟以蠖屈
時郭宜人垂白在堂上先生歎曰俟河之清人壽幾何

且吾親所爲歷百艱畫荻鞠我亦欲見吾所自樹耳何必華山之驟耳而後行違乎於是乃就銓拜山東滋陽令修廢舉墜扶弱抑強左右懍懍奉要東吏舞文卽細如蠶首而先生洞燭之諸權貴人無敢以竿牘撓先生政又最慎於刑嘗夕按圜扉有童子而柘楊泣者則其祖負官金而三世逮者也先生惻然取贖錢百金代之償帑而釋之其明決仁恕雖他多類此乙丑河決徐沛上命大司空出行河檄先生董夏村水憲費不煩而築堅大司空上河功詔增俸一級丙寅報政兩臺薦爲齊魯第一循良令詔予恩於是先生二親暨丙子咸受封

屯留縣志

卷七

藝文

三

綸馬無何遂以賢聲異等被徵命滋陽人攀轂乞易車想不得行者久之乃相與立祠祀先生紀遺愛於碑碑成過者輒墮淚誠思之也明年丁卯拜先生南臺監察御史用覃慶晉御史封時封事多留中乃請置禁中章奏籍以防壅蔽語侵大璫大璫皆爲股弁戊辰請告歸庚午入臺尋奉命巡視鳳陽倉搜剔隱弊殆盡會江北歲不登粟貴而金賤疏請改折公私便之魏國子爭爵事連勳貴大臣上命南臺議法諸直指多以嫌故引避先生曰法官避誰當不避者挺身斷其曲直衆取先生議以上襲乃定先生在臺中獨立持風裁每矢口談天

下事骨鯁不爲周容時新鄭內江以相國攝銓憲換權柄專且重非高皇帝法羣臣無敢言先生毅然草疏論之疏成以示同官而同官飛聞相國所相國銜之遂出補陝西按察司僉事然天下皆知先生出以論相故人景慕先生名咸稱爲朝陽鳳矣先生分陝當理餉甘肅州甘州萬里孤懸塞也屯種多積逋故事習爲羈縻無敢問先生爲屯廢而責餉於民猶反裘而負薪也乃嚴按故積三五申令而比覈之寬其日月以待於是屯政舉而餉充鎮城圯大中丞屬先生繕葺之先生視城故沙築也沙善崩歲築歲崩民勞無有已時乃建議易以

屯留縣志

卷七

藝文

詩

輒遂屹然成金城焉未幾以郭宜人喪歸癸酉會上改元再用覃慶晉僉憲封明年大中丞上城功詔賜白金文綺乙亥免喪起補河南當分巡汝洛間攬轡登車慨然有范孟博澄清之志按百城之內凡矯虔吏虎冠而噬元元者刀筆扞文網者闔右甕城社恣睢莫誰何者大俠椎埋爲奸者悉以三尺繩之一路肅然桃李之垂於行者莫之敢援也會盧氏盜礦金聚羣不逞之徒以倡亂先生設方略擒之餘黨烏獸散大中丞且上先生彌盜功而忌者讒焉以蜚語聞上上謂先生兩朝才節寶臣也不宜爾下所司考驗而先生寃果大白庚辰補

四川高滄兵敘瀘州時都蠻新平移大將駐師守之先生招徠反側茲修其戒備將吏偷不事事者嚴罰之於是衆心歡且易靡風乃勃然振會有詔省官以叙瀘事兼領於川南先生當徙職蓋廊廟重先生望且以艱鉅畀先生而先生琴鶴東還值其配趙宜人喪遂堅臥不起時年甫六十餘或勸先生駕先生曰君不見南山之南北山之北白雲良足怡吾老陶元亮五柳幽棲自號羲皇上人吾將效焉乃誅茅治圃構風亭月榭其中以魚鳥花卉爲娛每葛巾芟服邀客清游一觴一詠暢然自適蓋十二年間人謂留吁大隱可方箕穎之重云先

生孝友仁厚貞介慷慨悉稟於天性自痛失怙早奉養郭宜人朝夕袒裼跪上食嘗瀝血草蔬聞宜人節於朝旣拜旌命覩坊表輒泣然泣數行下聞者莫不感動一姊字長子相距六十里而遙問餽之使踵相襲於道與人交正色嶽嶽慎取予重然諾排難解紛義所當赴視利害榮辱若蛤雀蚊蠱相過乎前也坦衷無城府絕不爲謾語危辭傾蓋之友言必披情愫見突梯陶誕首鼠兩端者必憤而唾之能自忍困不能忍人困里中待先生舉火者無慮數十家他若助婚喪撫孤稚拯厄熒燔券不收債者更僕未易述丙辰歲大祲盡發家庾食糲

民全活以萬計好獎引儒生開塾傳經戶外屢常滿而
更加意敦倫守道之人雖少賤必俯而讓左脫素履奇
袞都貴顯先生未嘗過而問焉以故宵人假子嚴憚先
生而賢人君子則翕然頌之不容口沒之日三晉薦紳
皆歎歎惋歎謂天奪我人倫鑒後起者將何師焉此豈
聲音笑貌爲之哉太史虞夔曰余觀李先生立朝大節
炳炳如丹視古之埋輪請劍者豈讓焉一鳴輒斥迴翔
外服者且十年乃先生無幾微見於顏色理官如家所
在有甘棠之愛年未耄而懸車相羊於蘭皋蕙畹之上
春風風人夏雨雨人望廬而成化嗟乎先生始終全德

屯留縣志

卷七

藝文

美

所謂三晉魁壘奇英非耶傳稱沒而可祀於社者微先
生其誰與歸世往往謂先生施不究蘊惜先生今先生
麟趾代興鴈行間方將奉先生經綸之緒建勲名於昌
辰語云造物之報人不於其人於其人之天所謂報先
生之天者乃於是乎在矣余不佞景行先生旣誌其事
於羨門之石以示鄉人士使之能自得師而繫之銘曰
矯矯先生兩間正氣紉佩好修卓哉匡世法星身應何
懼鼎臣忠規迪上逆耳披鱗霖雨手施何難邊吏惠澤
感人畫形墮淚考槃邁軸干仞鳳翔德輝遠覽迹隱名
彰里羨丹顏朝思黃髮纒帛方徵蒲車且發一朝蟬脫

邠返太虛貞風勁節太史可書我儀古人龍門御李獲
事先生執纜幸矣高原大隧永兆昌隆牛眠叶吉將啟
槐公海美先生儒林不式億萬斯年有銘在石

明贈光祿寺卿路公墓誌銘

長平趙 軌

往余同年友李侍御八泉嘗道其鄉有庶幾古逸民者
曰路處士率真履素鶻德奮修飭方訓後志岑岑欲駕
流伍嗣當有顯者聞也斯其人亦足述矣一日嗣君進
士走伴持侍御狀懇銘其父墓問之則向所聞路處士
者也嗟嗟善人茲已乎按狀處士諱棟材字大器姓路
氏別號東溪潞之屯留人也先系無乘莫稽有祖順者

屯留縣志

卷七

藝文

七

生聰爲陰陽官聰配王氏有二男孟棟梁以監生爲易
州吏目仲卽處士季棟方處士先亦爲陰陽官遭例革
之遂韜蹤林莽爲人醜字慙質不飫華美外若木翁而
中則炯然邀然人自親畏聆其言則婉而確秩秩而章
也與人交坦無機穽人亦無機穽處士者鄉人戚人族
人咸與姻諧無懟後言生平無事買營室無贖儲惟勤
心於課子方進士君之幼也爲之擇塾師謹訓術以端
蒙養長則令出就外傅凡其致情禮於傅者罔非殷務
得其歡心以勸教事買書肆中雖捐簪珥不吝曰賣金
買書先正曾子言之吾兒若致名科顯與時翺翔大吾

宗耀吾族里猶吾出也奚啻金重乎若處士者身雖不
仕而道欲行人不儒而心固儒矣乃嗣君祇承嚴志矢
心下學應科丙午輒發晉解齡纔十九耳人士咸奇之
迨癸丑登進士第觀政地官路氏固灼灼彰矣雖嗣君
資學之粹培植之隆實處士庭訓之篤有以玉之也是
秋督餉代郡事竣便道歸省適值處士六旬初度嗣君
稱觴膝下處士曰吾兒成名果諧吾志拜若官毋怠若
職毋負若所學毋墮吾望心一時鄉人罔弗闐忻忻謂
處士獲教子之報云甲寅春嗣君拜合南樂處士遺書
戒之曰令者親民吏也始仕親民當傾心中忠愛持以清

屯留縣志

卷七

藝文

三

慎勤久終不渝斯能官矣夏季迎處士於南樂南樂之
政紀法峻明蔚聲載境處士喜曰吾兒初服官政事不
諳闕今若此吾慮解矣遂抽身而返今乙卯夏初處士
忽心痛危甚嗣君聞之乞休不獲假差甯山得便省處
士驚曰忠孝一道也若忠卽孝我矣何省爲旣曰吾病
瘥矣爾當適任王事不可忽慎圖慎圖去未幾卽捐正
寢是爲六月十五日也嗚呼處士性素沖淡終其身無
傲無伐雖履嗣君貴如平時迨其屬纊而神氣不亂顧
言炳炳可謂得正而斃者矣聞者鮮不愴然淚也雖其
壽不孚德享不酬功而子姓孳孳未艾嗣君方馳聲宦

轍徐扈徂蘊異時致身樞峻龍章渙頌追昭潛隱以揚
未播之休者不謂隱淪之名者邪是宜銘銘曰膏沃者
光必灼源濬者流必洪吁嗟處士豐其積嗇其身留裕
嗣人先民哉

明知府霍公墓誌銘

兵部尙書上黨程正己

天啟丁卯余以慙忤權璫被謫汾上倉皇就道遂不及
與公一晤別也然審公善飯健步履修齡未艾乃未幾
而訃聞至余爲悼盡不能已越歲聖天子改元崇正余
謬蒙還召道出屯邑始得一哭公已已閏四月十七日
將卜襄事公嗣維岳余婿也持自所爲狀詣余請銘余

重留縣志

卷七

藝文

三

以咸詭亦知公者曷忍辭公霍姓諱應麟字瑞環別號
名聞邑之史村里人先世有諱允者生志學志學生文
簡樸酷古舉鄉飲賓壽九十又八是爲公大父父騰號
龍洲生而岐嶷始習舉子業霍氏文明惟龍洲公開之
博學雄詞十戰棘闈竟艱一第以顯皇帝登極恩貢任
遼東廣甯左衛經歷芳躅種種載在志中後以公達州
最得贈奉直大夫四川達州知州母李氏贈宜人繼母
王氏封太宜人龍洲公有三子伯卽公仲應鷗散官季
應鵬河津教諭公幼失恃一切奉龍洲公庭訓惟謹象
勺時卽補邑庠弟子員無何食邑廩與季弟同志下帷

每試冠多士邑有雙璧之稱龍洲公入國學大父年已
近期頤公先志承順寢處飲食罔不當大父意者龍洲
公歸而心善公意尤愜也萬曆壬午公偕季弟赴省試
公哀然賢書季弟亦首列乙榜嗣乃得明經薦先是龍
洲公有麟躍鵬飛之夢至是驗矣方公在闈中時恍惚
見一冠冕者朱符鈐卷意謂新科例也已乃詢之人驚
未有喧傳異之豈科名定數冥冥中真有司之者邪龍
洲公宦游遠左獨留公綜理家政公一惟龍洲公命米
鹽瑣屑不憚煩既而龍洲公疾不起公以未獲永訣抱
終天恨杜門請禮屏祛人事毀瘠之狀三年一日也服

闕再上春官不利始謁王爵氏授達州守至則廣詢民
瘼銳意興除而然犀之明燭見幽隱州商王家棟者負
寃以死歷讞莫得其情公禱之於神夢得微指尋捕獲
一訊服而寃得雪州人無不畏服而頌神君未幾有皇
木之役往例僉坐殷實祇爲東濕考成民不堪病公先
以二千金招商相與裹糧入深山絕巖中濟巫峽一浪
破舟從者胥溺公獨引捧符吏躋片木上四顧森茫援
者莫逮俄而上流漁人一葉相挽得免於危倏忽失漁
人所在左右始訝以爲神嗣是諸大木應索而得額限
弗愆當事者交章薦公矣已而元配李宜人卒宜人卒

於宦邸公屬其冢子扶廣柳還蜀道艱遠抵舍而沒公
鬱鬱恆不懌適報最膺恩意稍釋自是器手相習士民
愛戴循聲藉甚薦紳間臺使者方上書有部擢之請公
自守斤斤莫爲援手僅遷寶慶倅邵陽衝渡波濤洶湧
往來葬魚腹者相望公慨然出橐金五百爲諸好義者
倡遂起石橋遙里許下可通舟額曰虹橋寶父老抵今
論公功德者不衰甫一載丁王宜人憂公哀毀不異龍
洲公肩節時諸周身之具旣從豐縵然織毫取之俸餘
於仲季不少責也除服補慶陽聲實懋著時郡守乏人
廷議謂非公不可慶陽者遂擢公爲慶陽太守北地多

荒田民習游惰公首下令墾荒以復農業無幾何桑麻
遍野民稍稍裕蓋藏矣州邑起解銀錢應其部司豫令
緘識公第爲批給督行錙銖不以入庫衛所官軍俸糈
卽檄諸州邑徑解衛所間有侵削者公一以法繩之演
武場曠地若干頃公爲募民給以牛種西成所獲著令
爲修城費率廉關貢士唐以事註誤罹法網中公皆爲
之極力平反不撓法而脫於罪比以入覲行也相沿餽
遺一概謝絕行李蕭然惟圖書數笥而已及抵都商有
齟齬公者公歎曰仕路風波人情嶮巖何事不歸不有
吾初服在耶遂解組不復出甘載山阿翛然塵外督農

誤子之隙與一二知契徒步郊游于于適也大抵公慈
祥和易與物無忤若大節所繫則慷慨肩承勞怨不避
以故宦游隨地規矧赫然而清白之操可對天日民所
爲在在尸祝奉之無斃也以至家庭而友于誼篤閭井
而施予惠殷竿牘盡捐雞豚不事宜其卒之日無親疏
遠邇罔不欲歔泣下也公其養邃德純可以範今式後
者哉先是邑侯禮延鄉飲屢辭後偶一出應執事者視
昔有虔可以觀人情矣易簣時猶剖分家務訓戒後人
靡弗井井余聞夫全而歸者不亂其公之謂矣公享壽
七十有八元配李氏贈宜人繼配牛氏封宜人子孫綿

屯留縣志

卷七

藝文

聖

編不且述銘曰於惟霍公道貌天形出也龍見處也鴻
冥宦轍至止枯甍仆起如日於冬如哺赤子俎豆載馨
式化爾庭既順既翕於範於型太和磅礴敦龐噩噩辟
草而風廉頑敦薄軌物可遵令聞是新箕裘紹遠報食
善人佳城合瑞貞珉在隧以質九京銘辭無媿

明漢中府通判李公墓誌銘

蒲州

楊世芳

別駕公掛冠而歸來也已廿載餘矣兩豆塞耳不聞雷
聲一葉蔽目不睹泰山棲老屋下靜攝不避穀修煉不
丹鉛止圖書數卷日與兒孫相課不知老之將至云爾
前年歲在龍今年歲在蛇青牛脫駕矣嗟哉夢白孝廉

君余年兄弟也爲大父請誌余子輩不敢辭啣淚搗管
曰恨下里不獲飛鶴願將以一言圖龍也敬誌按狀公
諱思謙字養德益齋其別號也世上黨屯留人公夢塵
而生聰靈瑞秀穎悟出人志學補博士弟子員未幾登
隆慶丁卯第知命除河南武陟令耳順調河南布政司
檢校卽陞陝西漢中通判未幾從心歸里於茲飛象過
潯溪宰相七春矣公爲人仁慈正直廉靜寡慾讀書樂
之不倦汲汲章章欲企古人事親至孝也太公素疾且
疽公吮喻不異黔婁君子而事繼母綽有蘆荻風篤於
兄弟倍齡兄乏嗣衣衾棺槨必克思齡兄遺兩孤撫如
屯留縣志

卷七

藝文

三

已出弟思廉思睿教成秀士至痛廉弟從泣倉皇不異
脊合惠於姐妹姐疾然其鬚及真文趙應奇抵漚稅四
十餘兩無難色慈於猶子璞花官銀三百兩有奇應遣
隱逃公悉變已產償之事襄招還誠伯道心哉其教子
石方繩以義弗納於邪俾五子有成凜然寶禹鈞家法
刑妻有道也苗姑性厲兼翁老病媼媿又不相得公曲
調之如鼓瑟琴以至賑荒貸貧弔喪問疾無不周處鄉
黨則彥方也詩曰我思古人實獲我心其公之謂與入
上公車不獲伯樂一遇公輒曰已矣朋友勸曰巢由得
矣蒼生若何翻然乃割武陟下車榜示一十六款首進

鄉三老陳六論反覆利害曉譬之匪怒伊教家人父子相話時旱魃肆虐百姓告擾曰焚旱婆公叱曰我爲子而殺子不祥且曰天欲旱婆何爲不若自焚齋居減膳露禱索神三日又不雨百姓不懌公勞益甚夜夢一老至曰乞寃公寤曰天不雨囹圄寃與晨起索招果閱得一嬾毒翁事全類齊庶女公問其故曰如何毒爾翁嬾曰翁耘嬾饋以其餐懸古樹上歸不知其由竟坐公斷曰得非樹蠹乎曷問樹劈獲蛇嬾寃白是日雨上臺奇其事旋撥一疑獄趙科事經訊不決公一鞫卽讞上下稱若神明武俗多悍逼妻迫母圖財國申死者枕藉公

痛懲之下令曰有以非繼告者辟人不死世窩安康腹劍廿載未覺百姓死筆頭者不勝紀公廉訪囊頭豎死闔境稱快以至漕米馬政徵法世爲武惠公力去其累民不知利教樹教績凡有利於民者知無不爲其士子久不習制舉業公曰吾爲之破天荒館課躬提一時人文丕變任生民望果開甲子榜嗣丙午毛生乙卯薛生壬生彬彬繼起皆公昔日栽培桃李也至問公操又出常情外不知官觀其家人峻宇公拆屋人拓地公賣田畧一錢縣魚較何若當途嘉乃績旌乃廉譽章交集矣庚子入觀諸薦紳及父老遮道贈曰清風兩袖明月一

腔而墜禪淚竹不待言云無何有貧墨子推官趙索澹
細百疋不應歎曰我不敢殺人以媚人竟中其蠶邑人
聞之莫不扼腕甲辰補閑散丁未遷別駕疾乞骸歸歎
曰田園之樂樂乎哉杜門謝客披圖課子幾三十年初
不知有人間事邑宰高其品鄉士景其德兩舉鄉賓誓
不出也大抵公淡富貴樂清貧一生無奇好惟好讀書
疾革猶惓惓顧諸子曰我無金玉貽子無菽粟貽子並
無做服垢帶貽子止有一言以貽子曰不斷書香吾可
瞑目地下矣死之日囊囊蕭然四壁淒其惟見架上牙
籤泠泠風動而已鄉黨弔者莫不欷歔淚下曰清白吏
屯壘縣志

卷七

藝文

星

子孫必有爲三公者噫所謂鄉先生沒可祀於社者其
在斯人與其在斯人與厥配馮孺人先公卒懿徽公自
爲銘不余贅茲卜辛未春二月廿八日吉時啟窆而與
公合焉公生於嘉靖癸卯年九月初八日卒於崇正己
巳年八月二十三日享年八十有七鶴髮童顏續息神
色不變精凝神固殆遐算千百未艾天強之天欲爲山
川惜秀子孫留有餘也云爾銘曰晴金馬濯濯不青駒
爭爭也騰珂鳴戛戛不鬻振切切也富貴功名之有盡
也聖賢之不死也

浙江甯海縣知縣淡庵孫公墓誌銘

邑侯 閻天培

余承乏留阡甫下車卽詢問邑中賢達冀得一長者以
自律聞象陽孫公自天台旋里杜門不出與其弟天與
公竭力事母深得母氏懽心且兄弟甚相友愛每出入
必偕未嘗一日離也暇則聚塾中與生徒子姪輩講論
不輟余聞而賢之後嘗過其家見所居湫隘僅蔽風雨
服飾器用率稱是退而歎曰居家之清貧如是則在官
之不貪可知奈何不合於時而遽去也每於飲酒讀法
時一接見之未嘗不心慕其爲人旣而公居太夫人喪
哀毀過禮幾至滅性蓋自是培之庭無公之迹矣公營

屯留縣志

卷七

藝文

巽

葬地數年不決深懼誠信未至貽悔終身因而情事未
伸常撫柩悲號嗟乎貧似曼卿不聞友付麥舟孝類子
平無人代營塚壙上下無交何過之窮也無何公亦遘
疾竟成古人聞屬纊時猶呼母氏蓋以不得葬其母爲
恨也嗚呼悲哉子肯播等謀葬公因持其所爲狀謁余
丐誌銘且泣曰日月有時將葬矣計可以不朽吾父者
惟隧間此石耳嗚呼公自有其不朽者余亦安能不朽
公哉按狀公諱奇字象陽號澹庵姓孫氏世爲屯留人
其曾祖諱敬祖以文章知名孫氏遂成望族子姓蕃衍
能世其學遞至公凡四世恩歲貢者七人仕者五人壽

其矜者指不勝屈也故邑中登科第據要津者不乏人而孫氏家學淵源秉鐸鄰邑多所成就人獨稱其有儒者氣象焉公之祖諱嗣功舉丈夫子四人其四卽公父諱家彥字好我文品高卓在難兄弟中有最良之目惜不壽多頽子一年而卒卒時公與其弟蘭年未週支榮煢無依母李氏撫而教之卒以成立此公所以老且死猶惓惓念母不置也公生而聰敏復嗜學所讀書歷久不忘有所稱引輒刺刺不休治尚書佶曲聲斷公能口授如伏生善屬文試輒驚人甚爲衡文者所賞識公益自奮勵晝則閉戶夜則嘗熊市井之人罕得識其面其

屯留縣志

卷七

藝文

聖

伯父竊喜計之曰大吾宗者端在斯人卽公亦未嘗不自負以爲撥巍科致顯位直尋常事也甲午歲俾州縣各貢一人公遂入國學丁酉廷試考上卷辛丑八月拜甯海縣令偶而得之非其所樂不知者爲公賀以爲仕路壅塞他人極力鑽營不能得者公取之如拾芥亦可藉是慰母氏也嗚呼如公之英氣逼人其志豈止欲博一貢宰一邑而已哉使遲之數年以老其才鎖之兩闔以竟其學其揚名顯親必有更赫於此者旣膺民社壯志遂虛先儒以少年得志與有高才能文章爲不幸政爲此也公受命赴浙論者或爲公危之謂公之才畧未

必遠過虞詡而甯海時勢與朝歌不同朝歌莠民稷作
設計擒治聞風駭散甯邑濱海海寇去來靡常守禦爲
難恐非白面書生所能辦也公到任纔二日寇逼城下
王鎮撫引兵出戰人情洶洶靡有固志公挺身而出繕
器械具芻糗爲固守計遣兵接應勉以忠義士氣百倍
寇知有備遂遁去王鎮撫見公倉卒調度悉中機宜喜
曰小范老子胸中自有甲兵甯之福也兩人遂深相結
締爲刎頸交甯民恃以無恐時

朝廷厭用兵議遷海上之民於內地沿海一帶悉爲灰
燼民之無歸者攜老幼轉徙他鄉嗷嗷之聲慘不忍聞

公爲之惻然設四粥厰令四巡檢董其事食米八百餘
石全活甚衆且饑饉之餘瘟疫大作死者遍野視其無
主者公具棺掩之約費數百金或規之曰小惠未徧民
弗懷也公曰民父母我我不賑誰當賑者視吾職之所
得爲與吾力之所能爲者爲之而已非以此示惠也昔
宦頂應鼇因家奴盜財曰於官奴挾仇誣鼇通海寇依
律坐斬繫獄十餘年公按舊案閱之心知其冤力爲申
雪獲免甯民黃紀之妻與趙淑京之妻兄弟也兩姓約
爲婚姻以岳母董奴爲媒以花鐲爲禮紀亡家業蕭條
京將女改頂氏紀子玉訟於官京畏公明決俛禮書張

天錫餽金二百公佯受之庭訊時盡得其情因取原金
十二兩給京作聘儀餘付玉充妝奩費今擇日迎親呼
京至案前爲陳說一與之醮終身不改大義京亦愧服
兵民間之無不稱快夫雀蟻微物也餽雀渡蟻古今稱
盛德焉雞絲細故也被雞鞭絲吏民頌神明焉若夫賑
饑掩骼有德可懷辯冤扶弱有威可畏如公者方之古
人詎不偉哉且公之循政更有不可泯滅者甯爲正學
方先生故里舊祠在邑南之岳龍山公特加繕葺以妥
忠魂又爲增祀出視原額有加俾俎豆常新每拜謁輒
揮涕曰夷齊死後君臣寔薄篤斯義者唯先生一人而

屯留縣志

卷七

藝文

完

已更仰體

聖天子右文至意留心作人捐俸五十金重修魁光樓
聚多士絃誦其中退食之暇親來省試時復取正學先
生大節共相砥礪期不愧先正士之親色笑者莫不喜
其來而嗟其晚也夫崇獎忠義人紀以立造就譽髦文
教彌隆此真爲治之急務而俗吏之所謙讓未遑者也
其他善政未易更僕數姑誌其大者如此而公之廉明
仁恕亦畧見於此矣但地方荒殘民間逋賦累億萬計
公切於撫字常與民相寬假竟不爲當路者所容治民
有心獲上無術公且奈之何哉然聞公北旋時邑中父

老皆爲隕涕老幼相扶攜送者約數千人夫公蒞甯僅三載其所設施尙未展盡底蘊今且放廢不過空谷間一閒人耳非有威力足以攝服吾民而民不忍舍之而去豈盡民情之厚母亦公之感之者深與嗚呼假令公當日者不賑饑不掩骼不爲民辯冤抑不捐金營造在上者度未必以此短公且賈其禦寇之力以急聚歛矜其明辯之智以察秋毫存其賑捐之金以實囊橐則逋賦未必如此之多其黜公未必如此之速卽不幸見黜亦未必蔬食飲水貧困如此之甚至不能祭葬其母也顧乃急於彼而緩於此不爲鷹鷂爲鸞鳳不爲蘭絲爲

屯留縣志

卷七

藝文

率

保障是猶彈琴瑟於好竽之門陳文繡於裸體之國宜其柄鑿不相入也悲夫是宜銘銘曰志不在貢而恩拔之志不欲仕而縣令之無意而得之無罪而去之嗚呼孫公竟已於斯彼蒼可階而升吾將謁司命而問之

奉政大夫同知銜歷任直隸東鹿懷安豐潤縣知

縣楊君墓誌銘

翰林院編修前湖北學政河東賈璠

君諱中桂字丹林予同年友也幼嗜學及長偉軀幹志趣高雅凡經史百家罔不涉獵尤愛讀左傳爲文有奇氣下筆千言滔滔莫禦汪良山太史視學山右賞其才擢入邑庠踰年食餼丙午占解海內爭誦其文丁未試

